

D BAUSCHPANN WERDE HÜT UFGSCHELLETT – ES GOHT VORWÄRTS MIT EM NOIE ST. BERNHARD

September 6, 2016 *by Wettiger Nochrichte*

Lang het me wenig vernoh vom Bauprojekt vo de St. Bernhard AG im Langacker. Jetzt wird s Projekt für alli sichtbar!



Mit 29 Bauschpannstange werde hüt alli Ecke, Höhe und Länge vom plande Noibau im Langacker markiert. Glichzeitig wird e Voriigab fürs Baugsuech bi de Gmeind iigrecht. Damit wot d Bauherrschaft St. Bernhard AG wichtigi Berich la prüefe, wi d Gschossigkeit, s Bauvolum, d Gränzabständ und s Erschliisgs- und Umgebigskonzept.

S plante Alterszentrum, wo d St. Bernhard AG für d Wettiger Bevölkerig wot errichte, wird e noii Dimension vo de Altersbetriig biete. Nebe de 100 Pflegzimmer und drü Feriezimmer, sind au 41 Einehalb- und 31 Zweiehalb-Zimmer-Wohnige planed. S

Pflege- und Betriigaaagebot und d Wohnige mit Dienschtleischtig sind di ideal Kombination für e fortschrittlichi Altersbetriig, so schriibt d St. Bernhard AG in ihre Mediemitteilig.

Noi isch, dass d Bewohnerinne und Bewohner au dann in ihre Wohnig chönnd bliibe, wenn si pflegebedürftig werde. Mit em Konzept «Wohnen bleiben» realisiirt d St. Bernhard AG so e Vorgab us em Altersleitbild vo de Gmeind Wettige und isch eini vo de erschte Inschitutone im Aargau, wo so es fortschrittlichs Konzept in de Altersbetriig aabiete wot.